

Канон Индикту (Новолетию)

Празднуем 1 (14) сентября

Тропарь, глас 2-й

Всея твари Содетелю, временá и лета во Своей власти положивый, благослови венец лета благодости Твоея, Господи, сохраняя в мире Императора, и град Твой, молитвами Богородицы, и спаси ны.

Канон, глас 1-й

Песнь 1

Ирмос: Поим вси людие, от горькия работы фараони Израиля Изведшему и во глубинé морстей ногами немóкрыми Наставльшему, песнь победную, яко прославися.

Припев: Слава Тебé, Бóже наш, слава Тебé.

Воспойм вси Христу́, Имже составишася всяческая, и в Немже совершишася неразлучна, яко из Безначальнаго рождшуся Бóга Отца́ Ипостасному́ Сло́ву, песнь победную, яко прославися.

Слава Тебé, Бóже наш, слава Тебé.

Воспойм вси Христу́, Отчим благоволением явльшуся из Дéвы, и проповедавшу лето Господне приятно, нам на избавление, песнь победную, яко прославися.

Слава: В Назарет пришед Податель закона, в день субботный учаше, законополагая евреем пришествия Своего неизреченнаго: имже яко Милостив спасает род наш.

И ныне: Поюще вси вернии Предивную Отроковицу, Христа́ вселенней возсиявшую, и радости всяческая исполнившую, Присносущныя Жízни, присно восхваляем, яко прославися.

Песнь 3

Ирмос: Утверди мене́, Христé, на недвижимом камени заповедей Твоих, и просвети мя светом лица́ Твоего́. Несть бо свят паче Тебé

Человеколюбче.

Сла́ва Тебе́, Бо́же наш, сла́ва Тебе́.

Утверди́, Бла́же, егóже насади́ любóвию на земли́ десни́ца Твоя́, плодови́т виногра́д, сохра́няя Твою́ Църковь, Всеси́льне.

Сла́ва Тебе́, Бо́же наш, сла́ва Тебе́.

В де́лех духо́вных Богокрасных крася́щихся, наста́вшее, Го́споди, ле́то си́е, преведи́, Влады́ко, и́же ве́рою Тя песносло́влящая, Бо́же вся́ческих.

Слава: Тихий ми, Христé, ле́тний круг дава́й, Ще́дре, и насы́ти мя словéс Божéственных Твои́х, я́же яви́лся еси́ глаго́ля иудеем в суббо́тах.

И ныне: Яко Еди́ну преестéственно па́че челове́ка благода́ть во Твою́ утробу приéмшую, и невращно ро́ждшую Христа́ Бо́га на́шего, при́сно Тя сла́вим.

Го́споди, поми́луй. (*Трижды.*) Слава, и ныне:

Седален, глас 8-й

И́же временá плодonóсна, и дожди́ с небесе́ пода́я сущим на земли́, и ны́не приéмля мольбы́ рабо́в Твои́х, от вся́кия изба́ви ну́жды град Твой: щедрóты бо Твоя́ и́стинно на всех де́лех Твои́х. Те́мже вхо́ды благослови́ и исхо́ды, дела́ исправи́ в нас рук на́ших, и согрешéний прощéние да́руй нам, Бо́же: Ты бо из не сущих вся́ческая во е́же бы́ти, я́ко си́лен, привéл еси́.

Песнь 4

Ирмос: Разуме́х, Всеси́льне, Твоé смотре́ние, и со стра́хом просла́вих Тя, Спа́се.

Сла́ва Тебе́, Бо́же наш, сла́ва Тебе́.

Начáло Тебе́ ле́та лю́дие Твои́ прино́сят, а́нгельскими пе́снями славосло́вляще Тя, Спа́се.

Сла́ва Тебе́, Бо́же наш, сла́ва Тебе́.

Я́ко Человеколю́бец сподо́би начéншим ле́то и сконча́ти Тебе́ благоугóдно, Христé.

Слава: Вседержителю Еди́не Го́споди, лет обхожде́ния утиши́в, ми́ру да́руй.

И ныне: Я́ко приста́нище ны́не душ на́ших и твёрду наде́жду, Богоро́дицу вси воспо́йм.

Песнь 5

Ирмос: От но́щи у́треннююще, поём Тя, Христе́, Отцу́ Собезнача́льна и Спа́са душ на́ших, мир ми́рови пода́ждь, Человеколю́бче.

Сла́ва Тебе́, Бо́же наш, сла́ва Тебе́.

Исполня́й вся́ческая бла́гости, Христе́, Ты благо­растворе́нием и благопло́дием, благослове́нми венча́емо, многокру́жное ле́то рабо́м Твои́м да́руй.

Сла́ва Тебе́, Бо́же наш, сла́ва Тебе́.

Ле́тное воздая́ние покажи́ нам преложе́ние к лу́чшим: ми́рное же устро́ение ве́дущим Тя, Сло́ве Бо́жий, уподо́бльшася челове́ком.

Слава: На зе́млю пришёл еси́, Собезнача́льне Отцу́, плёнником отпу́щение, слепы́м же прозр́ение от Отца́ возвеща́я, и вре́мя приятно́.

И ныне: На́ши наде́жды, Богоро́дице Чи́стая, и на́ше жела́ние на Тя возлага́ем, Ми́лостива нам даждь, Де́во, Егóже родила́ еси́.

Песнь 6

Ирмос: Проро́ка спасл еси́ от кита́, Человеколю́бче, и мене́ из глубины́ прегреше́ний возведи́, молю́ся.

Сла́ва Тебе́, Бо́же наш, сла́ва Тебе́.

Жити́е нача́ти, благоуго́дно Тебе́, Влады́ко, с ле́тным начинáнием, нас сподо́би. (*Дважды*)

Слава: Дней духо́вных, в поуче́нии зако́на Твоего́, покажи́ исполнены́, Ще́дре Спа́се, пою́щая Тя.

И ныне: Ро́ждшая Го́спода, Богоро́дице Всенепоро́чная, изба́ви от бед ве́рою пою́щая Тя, Пречи́стая.

Го́споди, помилуй. (*Трижды.*) Слава, и ныне:

Кондак, глас 2-й

В Вы́шних живы́й, Христé Царю́, всех ви́димых и невидимых Творче и Зиждителю, Иже дни и но́щи, времена́ и лéта сотворивый, благослови́ ны́не венéц лéта, соблюди́ и сохрани́ в ми́ре православно́го Имперáтора и град и лю́ди Тво́я, Многоми́лостиве.

Песнь 7

***Ирмос:* Отроцы́ благоче́стию совоспита́ни, злочести́ваго велéния небре́гше, о́гненнаго прещéния не убо́яшася, но посреде́ пла́мене стоя́ще по́яху: отце́в Бо́же благословéн еси́.**

Сла́ва Тебе́, Бо́же наш, сла́ва Тебе́.

Начина́ющи лéто и пéсней нача́ток сотворя́ем ца́рствующему Христу́, Ца́рством безконéчным, правосла́внии лю́дие, благоче́стно пою́ще: отце́в Бо́же благословéн еси́. (Дважды.)

***Слава:* Сый прéжде век, на век же, и ещё́ Господь, воспева́ющим Тя, Христé, исто́чник бла́гости, благи́х Твои́х даро́в лéто сиé испóлни: отце́в Бо́же благословéн еси́.**

***И ны́не:* Яко раби́ Влады́це на моли́тву, Чи́стую Ма́терь Твою́ Тебе́ предлага́ем, Христé, от вся́каго обстоя́ния лю́ди Тво́я, Бла́же, изба́вити пою́щия: отце́в Бо́же благословéн еси́.**

Песнь 8

***Ирмос:* Песносло́вцы в пещи́ спáсшаго дéти, и громопла́менную прело́жшаго на ро́су, Христа́ Бо́га по́йте, и превозно́сите во вся вéки.**

Сла́ва Тебе́, Бо́же наш, сла́ва Тебе́.

Яко Нача́льнику спасéния, Христé, нача́ток Тебе́ прино́сит лётный, честна́я Цéрковь зову́щи: по́йте и превозно́сите Христа́ во вéки.

Сла́ва Тебе́, Бо́же наш, сла́ва Тебе́.

Из не сущи́х вся́ческая мýдре обновившаго Создáтеля, и Производя́щего вре́мен обра́щения хотéнием, по́йте и превозно́сите Его́ во вéки.

Слава: Изводящему всяческая Бóгу, и времена́ Изменяющему, на многообразное человеков управлѣние, поём: хвалите и превозносите Христа́ во ве́ки.

И ныне: Богомáтерь Дѣву Чíстую, лет обхождѣнми же и обращѣнми, православно челове́честии собóри, поём Тя́ яко Богородицу, и всех спасѣние.

Песнь 9

Ирмос: Образ чíстаго Рождества́ Твоегó, огнепáлимая купина́ показá неопáльная, и ны́не на нас напáстей свирепѣющую угаси́ти мо́лимся пещь: да Тя, Богородице, непрестáнно велича́ем.

Слáва Тебѣ, Бóже наш, слáва Тебѣ.

Слóво Бóжие, и Сíла, íстинная Мúдрость и Ипостáсная, содержа́щая и пра́вящая всяческая мúдре, и ны́не наста́вшее рабóм Твои́м вре́мя, во устроѣнии ти́се произведи́.

Слáва Тебѣ, Бóже наш, слáва Тебѣ.

Вся дела́ Твоя́, Гóсподи: небеса́, земля́, свет и мо́ре; во́ды, и вси исто́чницы; со́лнце же, луна́ и тьма; звѣзды, огонь, челове́цы и скóти со А́нгелы восхваля́ют Тя.

Слава: Еди́н еси́ Превѣ́чный,́ яко Творе́ц веко́в: и ца́рствующее Триипостáсное Еди́но Божество́ неразде́льное, мо́льбами Чíстыя Богомáтере, ле́то плодоно́сно насле́дию Твоему́ покажи́.

И ныне: Спа́се всего́, и Строи́телю и Зижди́телю и Вседержи́телю тва́ри, мо́льбами безсе́менно Ро́ждшия Тя, мир ми́ру Твоему́ пода́ждь, соблюда́я Цѣрковь всегда́ немяте́жну.